

Tabrat n Bulus i Irumaniyyen

Tamezwarut

1 ¹Bulus, ismey n Yeccu Lmasih, amazan itwařayan, itwahuz i řexbar ařebħan n Arebbi, ²řexbar ařebħan wenni izzar iwaed zzayes s imkacafen nnes deg idlisen iqeddsen, ³řexbar ařebħan x Mmis wenni i d yusin zi zzariet n Dawud zi jjihet n weysum, ⁴maca zi jjihet n Arruħ n tqeddast aqqa netta itwassbeyyen d Mmis n Arebbi s jjeħd zi tnukra nnes zeg imettinen: Yeccu Lmasih Siditney. ⁵Aqqa zzayes i neřtef nniemet d tazant (=řxedmet n umazan), ħima marra řegnus s liman ad řtaen i yisem nnes. ⁶Aqqa kenniw, inni itwařayan zi Yeccu Lmasih, zzaysen i teğam eawed. ⁷Yar marra imeizzen n Arebbi inni iğan di Ruma, inni itwařayan d imqeddasen: nniemet d řehna i ħarwem ħa iřin zi Arebbi Babatney d zi Sidi Yeccu Lmasih.

Bulus ittweħħec ad yarzef ħar Ruma

⁸Amezwar ttcekkarey Arebbi inu s Yeccu Lmasih zi jjihet nwem marra, minzi liman nwem arrin as-d řexbar di ddunnit marra. ⁹Arebbi, wenni eebbdey s Arruħ inu di řexbar ařebħan n Mmis, iched xafi mammec kenniw ttidarey nnebřa abeddi di řağitin inu, ¹⁰ttzağiy řebda, ma izemmar řexxu ad iřiq ij n umur s array n Arebbi ad ħarwem-d aseř. ¹¹Minzi weħħcey ad kenniw řarey ħima ad awem wcey ca n tmewca n nniemet n arruħ i d awem ħa iwcen jjeħd, ¹²ħima ad netwassfewwej jaraney s liman wenni dayney, liman nwem d wenni inu. ¹³Maca war xseř ca war tessnem, a awmaten, belli ařtas n imuren ggiy ad ħarwem-d aseř, ħima ad ħari tiři řyiğet daywem eawed, amecnaw di řegnus nneđni, maca ař ass-a ead war zemmarey ad d aseř. ¹⁴Necc d bu-umarwas i Iyunaniyyen d ibarbariyyen, i ayt n tiyit d iqubbaniyyen. ¹⁵X uyenni aqqa-yi wejdey ad kenniw barrħey s řexbar ařebħan uřa i kenniw i iğan di Ruma.

Jjehd n řexbar ařebħan n Yeccu Lmasiħ

¹⁶Minzi war ttředħiř ca s řexbar ařebħan n Lmasiħ, minzi netta d jjeħd n Arebbi i usenjem n marra wi yumnen, i Wuday amezwar xenni i Uyunani. ¹⁷Minzi tasegda n Arebbi aqqa tban dayes *di linjil* zi liman řar liman, am mammec tura

“Maca amseggad s liman ad iddar.” Hab. 2:4

Lyadaħ n Arebbi

¹⁸Minzi lyadaħ n Arebbi i d ibanen zeg ujenna x marra řeqjaħet u x marra min war isseggden deg iwdan inni issduřuyen tidett s min war iseggden. ¹⁹Minzi min izemmar ad itwassen zi Arebbi, ittban daysen, minzi Arebbi aqqa isscen asen t-id. ²⁰Minzi zeg wami tetwagg ddunnit, timesřayin nnes war twazarent zi min zzayes-d itwaxeřqen, jjeħd nnes n řebda d tifras nnes n Arebbi, aqqa twazarent s řeeqeř zi řexdayem nnes ařami nitni war řarsen bu smaħet, ²¹minzi, umi ssnen Arebbi, war t sseuęen niř war t cekkaren am Arebbi, maca dewřen d ibuħařiyyen deg ixariřsen nsen uca uř nsen afyur ibarcen. ²²Umi ħessben ixef nsen d imiřiysen dewřen d ifyař ²³uca beddřen aeuęi n Arebbi wenni war ifennin s min yarewsen di řřifet n bnaħem ifennan: ijdaħ d lħayawanat s arebea n idaħem d marra lħayawanat inni ittbusen x tmurt.

²⁴X uyenni isellem iten Arebbi eawed řar řexmej s nneħwat n wuřawen nsen ħima ad ssfeďħen arrimat nsen jarasen. ²⁵Aqqa nitni beddřen tidett n Arebbi s uxarriq, eebden u xedmen i min d itwaxeřqen sennej i wenni ixerřqen wenni umi řar teęa lbaraka i řebda qaε. Amin. ²⁶S uyenni isellem iten Arebbi řar aħaħi infedħen, minzi uřa d timyarin nsen beddřen abrid n řřbiεet s min war ięin d řřbiεet. ²⁷Amenni iryazen eawed jjin tamunt eħařsab řřbiεet ak-d temyarin, deeęen s nneħwat ak-d wayawya, iryazen itteęgen řfedayeħ ak-d yeryazen, qebbřen deg ixef nsen řmunet i isdaħeęen axeřtu nsen.

²⁸Am war xsen ad qqimen ad ssnen Arebbi, isellem iten Arebbi řar řeeqeř war icnin ħima ad ggen min war ieeddřen, ²⁹emmaren s marra min war iseggden, s tuqeħbit d řřar d řřmee d tuεeffna uřa s řeħsed d uneęqi d umenři d teħraymect d řeqbaħet, aqqa nitni

d ixuwwajen inni itteawaden řexburat, ³⁰d inni issawařen s řyar d imcarrhen n Arebbi d imeyřaben d imeeffaren d ayt bu-uqemmmu d imesuffyen n tuęeffna d inni war ittięien i lwalidin, ³¹aqqa nitni nnebřa řefhamet uřa d teřdiqt uřa d řehnunect uřa nnebřa ařřah d areřmet. ³²Waxxa nitni ssnen řřukm iseggden n Arebbi, belli inni ittegggen aya sdaheęen řmewt, aqqa nitni war ttegggen man aya waha, maca areřřan eawed x inni t ittegggen.

Řehkamet iseggden n Arebbi

2 ¹X uyenni aqqa cek nnebřa smařet, a bnađem, kuř ijjen wenni iřekkmen, minzi di min třekkmed x wennedni, tetthasabed ixef nnek. Minzi cek wenni iřekkmen, tetteggged timesřayin nni simant nsent. ²Neccin nessen belli řřukm n Arebbi d tidett x inni ittegggen man aya. ³Ma tettyiřed aya, a bnađem, wenni iřekkmen x inni ittegggen timesřayin-a uca uřa d cek tetteggged tent, aqqa ma tzemmed ad tarewřed zi řřukm n Arebbi? ⁴Ma tesseřqarad agra n tcuni nnes d ttasie n uraji nnes d ttasie n řxađar nnes uca war tessined ca belli tcuni n Arebbi aqqa ineddeh i cek řar ttubet? ⁵Maca di ssibbet n tyennant nnek d wuř nnek war ittuben, tyarwed i yixef nnek lyađab deg wass n lyađab, xmi i d řa iđhar řřukm iseggden n Arebbi, ⁶wenni i řa ixegęšen kuř ijjen elahřab řexdayem nnes: ⁷i yinni ittřebbaren di řexdayem iřebřen uca arezzun aeuęi d ccan d min war ifennin, aqqa ad asen ixegęř s tudart n řebda, ⁸maca i yinni yarezzun imcubbecen, inni war itteřtięien i tidett, maca đeffaren i min war iseggden, aqqa ad asen ixegęř s tefqařt d lyađab. ⁹Řehřart d đđiqat ad asent x kuř řeemar n bnađem i ittegggen řyar, x Wuday d amezwar xenni x Uyunani, ¹⁰maca aeuęi d ccan d řehna ad iřin i marra wi ittegggen tcuni, i Wuday d amezwar xenni i Uyunani, ¹¹minzi Arebbi war ittegg bu řfarz. ¹²Minzi marra wi i řa ixđan nnebřa ttawrat, nnebřa ttawrat ad itwahellek uca marra wi i řa ixđan sadu ttawrat, aqqa s ttawrat ad itwahaseb, ¹³minzi war ięi inni ittesřan i ttawrat nitni d imseggaden řar Arebbi, maca inni iđeffaren ttawrat aqqa nitni ad twaseggden. ¹⁴Mařa řegnus inni war řar ięi bu ttawrat, ttegggen s řřbieet min dayes di ttawrat, aqqa yina d ttawrat i yixef nsen, waxxa nitni war řarsen bu ttawrat. ¹⁵Aqqa nitni sscanen belli řxedmet n ttawrat tura deg wuřawen nsen, am teched

εawed tnefsect nsen uca ixarrişen nsen deġmen uŗa ttdafaεen x ixef nsen jarasen ¹⁶deg wass min di i ȳa iŗaseb Arebbi x min innufaren deg iwdan s Yeccu Lmasiŗ εlaŗsab řexbar aŗebŗan inu.

Uday d ttawrat

¹⁷Aqqa cek, wenni itwasemman Uday, tsennaded x ttawrat uca tessemȳared di Arebbi, ¹⁸essned min ixş netta, aqqa tfarrzed min iŗebŗen, tetwassřemded zi ttawrat, ¹⁹tŗasbed ixef nnek d amgewwad n idaryarēn d tfawt n yinni iŗan di taġest ²⁰uŗa d amseggem yarrebān ibuŗariyyen d amseřmad n iqubbaniyyen - aqqa ȳarek řřifet n tmusna d tidett di ttawrat -, ²¹iwa cek wenni isseřmaden innedni, ma war tesseřmided ca ixef nnek? Cek wenni ittbarŗen ‘war tticar’, ma tettacared? ²²Wenni iqqaren ‘war zenni’, ma tzennid? D wenni icarrhen laŗnam, ma tacared zzawect nsen? ²³Cek wenni isseȳaran di ttawrat, ma tfedŗed Arebbi umi texdid di ttawrat? ²⁴Minzi x ssibbet nwem ittetwaceqqef deg isem n Arebbi jar řegnus am mammec tura. ²⁵Aqqa axtan ineffe maŗa tdeffared ttawrat, maca maŗa tettēdid x ttawrat, aqqa axtan nnek idweř nneŗa axtan. ²⁶Maŗa wenni nneŗa axtan ittetŗef di řumar iseggdēn n ttawrat, ma war iŗesseb nneŗa axtan nnes d axtan? ²⁷D wenni itteggēn ttawrat, waxxa netta nneŗa axtan εlaŗsab tŗbieet, ma netta war cek ittŗasab ca umi tēdid x ttawrat waxxa cek s řŗarf n ttawrat u s wextan? ²⁸Minzi Uday war iŗi d Uday s wudem waha, uŗa d axtan war iŗi d axtan s min ittbanen deg weysum waha, ²⁹maca netta d Uday wenni ittiřin d Uday di řaġay (=deg wuř) u netta s wextan wenni t ittiřin deg wuř s arruŗ, war iŗi s řŗarf n ttawrat, xenni aqqa aseȳar nnes war d ittis ca zeg iwdan maca zi Arebbi.

Řefŗeř n ttawrat i Wudayen

3 ¹I xenni, man řefŗeř ȳar Wuday, niȳ man tizi n wextan? ²Aŗŗas x kuř iȳezdisen! Xenni ȳar umezwar mmewcen asen wawařen n Arebbi. ³Mammec, maŗa tuȳa ca zȳaysen war uminen ca, ma xenni ad itwabŗeř řaman n Arebbi, minzi nitni war uminen ca? ⁴εemmarŗ, maca ad ȳiři Arebbi d tidett uca kuř bnadem d bu-ixarriqen, am mammec tura

“*Řima ad tetwaseggēd deg wawařen nnek
uca ad tȳellbed xmi i ȳa twaŗasbed.*”

Sbŗ. 51:4

⁵Maša min war isseggden dayney aqqa issbeyen tasegda n Arebbi, min i ya nini ead xenni? Ma Arebbi war yares bu řheqq, necc ssawařey am bnađem, umi xaney igga lyađab nnes? ⁶War xas nessiwir. Mammec i ya iřaseb Arebbi ddunnit řexdenni? ⁷Mammec maša tfeyyeđ tidett n Arebbi yar uęuęi nnes s uxarriq inu, mayemmi ead i ya twařasbey am umednub? ⁸I mayemmi war nenni, am mammec xaney ssxarriqen uca amecnaw mammec ca zzaysen qqaren belli neccin neqqar “Ad negg tuęeffna, řima ad zzayes-d tekk řsebřant”. Aqqa řřukm xasen s řheqq.

Uša d ijjen ittsegged qibač i Arebbi

⁹I xenni mammec? Ma neccin řsen? Lla emmarř, minzi qbeř aqqa neđřem iten s tnayen idsen, Udayen d Iyunaniyyen, belli nitni marra sadu dđanb, ¹⁰am mammec tura

“Uša d ijj war ięi d amseggad, ¹¹uša d ijj war ifehhem,
uša d ijj war yarezzu x Arebbi. ¹²Marra ffyen zeg webrid,
marra idsen dewřen war neffeen ca,
uša d ijj war ittegg řęđrafet, uša d ijj. Sbh. 14:1-3

¹³Tmijja nsen d ańeř yarezmen, s iřsawen nsen cemnten,
ssem n ifiřran sadu iyencicen nsen, Sbh. 5:9, 140:3

¹⁴aqemmum nsen iccur s nneeřet d tarzugi, Sbh. 10:7

¹⁵s iđaren nsen ttqeęiqen yar usizzeř n idammen,

¹⁶areyyeb d tamara deg ibriden nsen,

¹⁷abrid n řehna war t ssinen ca Ica. 59:7-8

¹⁸uša d tiggwudi n Arebbi war teęi qibač i titřawin nsen.” Sbh. 36:1

¹⁹Neccin nessen belli marra min teqqar ttawrat, aqqa teqqar it i inni ięan sadu ttawrat, řima ad itwaqqen kuř aqemmum uca ad tedweř marra ddunnit sadu řřukm n Arebbi, ²⁰minzi kuř aysum war ittetwasegged ca zi řexdayem n ttawrat qibač nnes, minzi s ttawrat tettas-d tmusna n dđnub.

Tasegda s liman weřdes

²¹Maca řexxu aqqa teđhar-d tseggda n Arebbi nnebřa ttawrat, tcehhed xas ttawrat d imkacafen, ²²aqqa tasegda n Arebbi zi liman

n Yeccu Lmasiḥ ɣar marra d x marra inni yumnen, minzi war din bu řfarz. ²³Minzi marra xđan uca ineqş iten ueuđi n Arebbi ²⁴uca twaseggden s tmewci n nniemet nnes s ufekki i iđan di Lmasiḥ Yeccu. ²⁵Arebbi igg it d tayarşť n weşřaḥ s liman deg idammen nnes, ĥima ad tban tsegda nnes, umi ten ijja ad xđan zic awarni ttasie n uraji n Arebbi, ²⁶ař i d ɣa tban tsegda nnes ida, ĥima ad yiři netta d amseggad uřa xmi d ittarra d amseggad wi iđan zi liman n Yeccu. ²⁷Mani iđa usemyar? War xas nessiwiř. S man ttawrat? S man řexdayem? Lla, maca s ttawrat n liman. ²⁸Xenni neĥseb belli bnađem ad itwasegged s liman, nnebřa řexdayem n ttawrat. ²⁹Niy Arebbi n Wudayen waha? Ma war iđi n řegnus eawed? Wah, uřa n řegnus. ³⁰Minzi Arebbi d ijjen wenni i ɣa itwaseggden s liman inni itwaxetnen d yinni war itwaxtinen ca. ³¹Ma nbeťteř ttawrat s liman? Wayyaw, s řemqřub, neccin ad neđmen ttawrat.

Liman n Ibrahim

4 ¹Min i ɣa nini x Ibrahim, jedditney, min yufa elaĥsab aysum? ²Minzi mařa jedditney Ibrahim tuɣa itwasegged s řexdayem, aqqa ɣares ccan, maca war iđi ca ɣar Arebbi. ³Minzi min iqqar wedlis? “Yumen Ibrahim di Arebbi uca itwaĥseb as-d d tasegda.” ⁴Wenni ixeddmen war d as tetwaĥseseb ca řmunet x řeĥsab n nniemet maca x řeĥsab n umarwas *minzi ttursen as-d*. ⁵Maca wenni war ixeddmen uca yumen deg wenni ittseggaden akafriw, aqqa liman nnes ad as-d itwaĥseb d tasegda. ⁶Am mammec iqqar Dawud eawed sseed n bnađem wenni umi d as iĥseseb Arebbi tasegda nnebřa řexdayem

*7“Sseed n inni umi itwayfar uxeťtu nsen,
inni umi issduři Arebbi ddnub nsen. 8Sseed n bnađem
umi war d as iĥseseb ca Arebbi ddnub nnes.” sbh. 32:1-2*

⁹Ma sseed-a x yinni itwaxetnen waha niy eawed x yinni war itwaxtinen? S minzi neqqar belli itwaĥseb as-d i Ibrahim liman d tasegda. ¹⁰Mammec d as t-id itwaĥseb? Ma řami tuɣa s wextan niy mařa tuɣa nnebřa axtan? War tuɣi s wextan, maca tuɣa nnebřa axtan. ¹¹Uca ikşi řeeřamet n wextan am ucemmie n tsegda n

liman wenni tuya itwaḥseb as-d umi tuya nnebṛa axtan, ḥima ad yiṛi d tababat i marra inni yumnen umi nitni nnebṛa axtan, ḥima ad asen-d tetwaḥseb tsegda εawed, ¹²uca ḥima ad yiṛi d tababat i yinni s wextan, war iḡi i yinni iḡan s wextan waha, maca gguren εawed deg isuraf n liman n jedditney Ibrahim umi tuya nnebṛa axtan. ¹³Minzi lwaed i Ibrahim niy i zzariet nnes belli ad yiṛi d awrit n ddunnit, war t iksi ca zi ttawrat, maca zi tsegda n liman. ¹⁴Minzi maṛa inni zi ttawrat d iwrinen, aqqa liman ixessaren uṛa d ṛwaed ibedṛen. ¹⁵Aqqa ttawrat tettaṛu lyaḍab, xenni mani war teḡi ttawrat, war din iḡi uṛa d axeṭṭu. ¹⁶S uyenni tettiṛi s liman, ḥima ad tiṛi s nniemet, maḥend ad yiṛi ṛwaed nican i qae zzariet, war iḡi i yinni iḡan zi ttawrat waha, maca εawed i inni iḡan zi liman n Ibrahim, wenni d tababat n marra idney, ¹⁷am mammec tura “Aqqa ggiy cek d tababat i waṭṭas n ṛegnus” ztat i Arebbi wenni zi tuya yumen netta, wenni issnekkaren imettinen d wenni ittṛayan min war iḡin axmi iḡa. ¹⁸Waxxa iqḍee as ṛayas, aqqa yumen s usitem, ḥima ad idweṛ d tababat i waṭṭas n ṛegnus am mammec itwannan

“Ammu i ya tiṛi zzariet nnek”.

Amz. 15:5

¹⁹Liman nnes war tui idēef, aqqa netta war d yarri ca taynit umi d tedweṛ arrimet nnes temmut am tuya ḡares εṛaḡaṛ meyya n iseggwusa, uṛa umi immut ueddis n Sara. ²⁰Netta tuya war icekk ca di ṛwaed n Arebbi am ijjen nnebṛa liman, maca imḥeḍ di liman nnes, iwca aeuḡi i Arebbi. ²¹Tuya issen nican belli min zzayes tuya iwaed netta, izemmar ad t igg tanya. ²²X uyenni εawed *liman*

“Itwaḥseb as-d d tasegda”.

Amz. 15:6

²³Maca war turi di ssibbet nnes waha “Itwaḥseb as-d d tasegda”, ²⁴maca εawed di ssibbet nney, inni d asen t-id i ya itwaḥseb, inni yumnen deg wenni d issnekkaren Siditney zeg imettinen, ²⁵wenni itwasellmen di ssibbet n ddnub nney uca itwassnekkar-d ḥima ad aney isegged.

Tayri n Arebbi s Lmasih deg wuṛawen nney

5 ¹Xenni neccin, am netwasegged s liman, aqqa yarney řehna ak-d Arebbi zi Siditney Yeccu Lmasih, ²wenni zzayes εawed idweř aney-d adaf s liman yar nniemet-a mindi nbedd uca nessemyar deg usitem n ucuđi n Arebbi. ³War iđi x man aya waha, maca nessemyar εawed di řehřart, nessen belli řehřart tettařu-d řřbar, ⁴d řřbar yiweđ-d taqeđebt uca taqeđebt ad tawi asitem. ⁵Asitem war ittseħcim ca, minzi tayri n Arebbi aqqa tetwafarrey deg wuṛawen nney s Arruħ Iqeddsen i d aney immewcen. ⁶Am tuřaney εad neđeef, tuřa immut Lmasih di tťwee n lkuffar di řweqt nni i d as itwaggen. ⁷Attay ad immet ħed di tťwee n umseggad, minzi di tťwee n uřebħan attay izemmar ad izεem ħed ad immet. ⁸Maca Arebbi imřa aney tayri nnes, minzi umi tuřa-neŷ εad d imednab, immut Lmasih di tťwee nney. ⁹Meċař qae řexxu i řa netwasegged s idammen nnes uca ad zzayes netwassenjem zi lyađab. ¹⁰Minzi řami tuřa-neŷ εad d řeedyan, netwasseřřeh ak-d Arebbi s řmewt n Mmis, meċař qae řexxu, awarni řami nufa ařař, ad netwassenjem s tudart nnes. ¹¹War iđi man aya waha, maca ad nessemyar di Arebbi εawed s Siditney Yeccu Lmasih wenni i zi neksi ařař řexxu.

Adam d Lmasih

¹²X uyenni, axmi s ijj n bnađem yudef-d dđanb řar dđunnit uca s dđanb tudef-d řmewt, ammu d tudef řmewt řar iwdan marra, am xđan marra. ¹³Minzi qbeř mma tuřa teđa ttawrat, tuřa dđanb di dđunnit, maca dđanb war itwařsib ca řami war din teđi ttawrat. ¹⁴Maca řmewt tuřa teħkem zi Adam ař Musa uřa x yinni war ixđin am Adam, wenni d řřifet n wenni i d řa yasen. ¹⁵Maca war iđi s uxeťtu amecnaw s min immewcen zi nniemet. Minzi mařa mmuten aťtas x ssibbet n ijj n uxeťtu, meċař qae i řa tfeyyeđ nniemet n Arebbi d tmewci s nniemet i waťtas, aqqa-tt d nniemet i iđan s ijj n bnađem, Yeccu Lmasih. ¹⁶Maca s tmewci war ittiři amecnaw s ijj n bnađem wenni ixđan. S minzi řħukm ittawi-d lħisab zeg ijj n uxeťtu, maca tamewci n nniemet tettawi-d zeg waťtas n uxeťtu ař i řa netwasegged. ¹⁷Minzi mařa s uxeťtu n ijjen aqqa teħkem řmewt x ssibbet n uxeťtu n ijjen nni, meċař qae i řa ħekmen di tudart inni iksin afeyyeđ n nniemet d tmewci n tsegda s yijjen, aqqa-t d Yeccu

Lmasih. ¹⁸Am mammec s ijj n uxeṭṭu aqqa idweř řhukm x marra iwdan ař lħisab, ammu eawed s ict n řxedmet n tsegda tettas-d nniemet ġar marra iwdan, ħima ad twaseggden i tudart. ¹⁹Minzi am mammec s uxeṭṭu n ijj n bnađem dewřen aṭtas d imednab, ammu eawed s ṭṭaet n ijjen dewřen aṭtas d imseggaden. ²⁰Maca sennej i man aya tusi-d ttawrat, ħima ad immarni uxeṭṭu. Maca mani immarni dđanb, temmarni nniemet ktar s waṭtas, ²¹ħima, am mammec iħkem dđanb ař řmewt, ad teħkem nniemet tanya s tsegda ař tudart n řebda s Yeccu Lmasih Siditney.

Aseyđas di Lmasih

6 ¹Min i ġa nini xenni? Ma ad neqqim di dđanb ħima ad temmarni nniemet? ²Emmarş, neccin inni immuten i dđanb, mammec ead dayes i ġa neddar? ³Ma war tessinem ca belli neccin marra inni itwassyeđşen di Yeccu Lmasih, netwasseyđş di řmewt nnes? ⁴Aqqa netwandeř akis s useyđas di řmewt, ħima am mammec d itwasnekkar Lmasih jar imettinen ġar ueuġi n Tbabat, ammu i ġa nuyur xenni di tejdidet n tudart. ⁵Minzi mařa tuġa nedweř d ijjen akis s warwas n řmewt nnes ammu i ġa nedweř eawed d ijjen akis s warwas n tnukra nnes. ⁶Aqqa nessen belli bnađem nney aqđim itwaşelleb akis, ħima ad tebdeř arrimet n dđanb, war ndikkwiř ead d isemyan n dđnub. ⁷Minzi wenni immuten, aqqa itwafekk zi dđnub. ⁸Mařa tuġa nemmut ak-d Lmasih, aqqa numen belli ad neddar eawed akis, ⁹minzi nessen belli Lmasih, awarni řami d itwasnekkar jar imettinen, war iggur ad immet eawed. Aqqa řmewt war xas tħekkem ead. ¹⁰Minzi zeg uyezdis n řmewt i immut, aqqa immut i dđnub ijj n umur i řebda, maca zeg uyezdis n tudart i iddar, iddar itt i Arebbi. ¹¹Ammu kenniw eawed: ħesbem ixef nwem d imettinen i dđanb, maca d imeddaren i Arebbi di Lmasih Yeccu Siditney. ¹²Xenni war tejjim dđanb ad iħkem di arrimet nwem ifennan, ad as teṭṭaem di nnecwat nnes, ¹³uca war ttewcim iyezdisen n arrimet nwem am dduzan i min war iseggden, maca wcem ixef nwem i Arebbi am inni idewřen ġar tudart zeg imettinen uca wcem iyezdisen n arrimet nwem i Arebbi am dduzan i tsegda. ¹⁴Minzi dđanb war xawem iħekkem ca, minzi war teġim sadu ttawrat maca sadu nniemet.

Isemyan n tsegda

¹⁵Mammec xenni? Ma ad nexða minzi war neği ca sadu ttawrat, maca sadu nniemet? Eemmarş! ¹⁶Ma war tessinem ca belli wenni umi tewcim ixef nwem d isemyan i ttaeet, aqqa kenniw d isemyan i wenni umi tettaem, mma i ddanb ař řmewt niy i ttaeet ař tsegda. ¹⁷Tqad as i Arebbi, tuya kenniw d isemyan i ddanb maca tdewřem tettaem s wuř i ddab n useřmed umi twassřemdem zzayes, ¹⁸uca řami twafekkem zi ddanb tdewřem d isemyan n tsegda. ¹⁹Ssawařey am bnađem x ssibbet n tuđeefť n weysum nwem. Minzi am mammec tewcim iyezdisen nwem d isemyan i řexmej u i min iğan dıđd n ttawrat ař i ya tđadđem ttawrat, amenni řexxu wcem iyezdisen nwem d isemyan i tsegda ař i ya tetwaqedđsem. ²⁰Minzi řami tuya kenniw d isemyan n ddanb, tuya kenniw d iħurriyyen zi tsegda. ²¹Man řyiğet i tuya ħarwem řexdenni zi tmesřayin tinni i zi tetteđđham řexxu? S minzi aneggar nsent d řmewt. ²²Maca řexxu, umi tetwafekkem zi ddanb tdewřem d isemyan n Arebbi, aqqa řyiğet i ħarwem i ya yiřin d tuqedđsi u xenni ħar uneggar d tudart n řebda. ²³Minzi řexřař n ddanb d řmewt, maca tamewci n nniemet n Arebbi d tudart i řebda s Lmasih Yeccu Siditney.

Amettiř n řemřac

7 ¹Ma war tessinem ca, a awmaten, ssawařey ak-d yinni issnen ttawrat, aqqa ttawrat tšeğeđ x bnađem min ya yekk iddar? ²Minzi tamyart tenni sadu weryaz s ttawrat, aqqa tettyima tuyer deg yiri n weryaz nnes mintra ead iddar, maca mařa immut weryaz, aqqa-tt tetwafekk zeg weryaz s ttawrat. ³Xenni mařa tedweř i weryaz nneđni, min ya yekk weryaz iddar, tetwasemma tezna. Maca mařa immut weryaz nnes, nettat ħares lħurriya zi ttawrat ařami war tzenni mařa temřec ak-d weryaz nneđni. ⁴Xenni, a awmaten, kenniw eawed aqqa temmutem i ttawrat s arrimet n Lmasih, ħima ad tdewřem i wenneđni i wenni d itwassnekkaren jar imettinen, ħima ad newc řyiğet i Arebbi. ⁵Minzi umi d aney tuya deg weysum, tuya ccehwat n dđnub xedment deg iyezdisen n arrimet nney s ttawrat ařami i ya awyent řyiğet i řmewt. ⁶Maca řexxu aqqa netwafekk zi ttawrat, aqqa nemmut x min tuya di netwaħbes, ħima ad nesbed s tejdideť n arruħ, war iği s teqđimt n řħarf n ttawrat.

Amenyi ak-d ddnub

⁷Min i ya nini xenni? Ma ttawrat d ddnub? Eemmarš! Maca war ssiney ddnub myir s ttawrat waha. Eawed aqqa war ssiney nnecwet mařa war teqqar ttawrat “War ttasem!” ⁸Maca ddnub yufa lfuřa s tewřeyyet uca tegma dayi kuř nnecwet, minzi nnebřa ttawrat ddnub immut. ⁹Zic tuya ddarey nnebřa ttawrat, maca umi d tusa tewřeyyet, ibda ddnub ad iddar uca mmutey. ¹⁰Uca ufiy belli tawřeyyet tenni i tudart, aqqa-tt i řmewt. ¹¹Minzi ddnub, am yufa lfuřa s tewřeyyet, icmet ayi uca inya ayi zzayes. ¹²Xenni ttawrat iqeddsen d tewřeyyet iqeddsen, tsegged u teřbeř.

¹³Ma idweř ayi min iřan d ařebřan d řmewt? Eemmarš! Maca ddnub, řima ad iban ddnub, issegma dayi řmewt s min iřan d ařebřan, řima s tewřeyyet ad idweř ddnub d ddnub ař aneggar. ¹⁴Aqqa nessen belli ttawrat zi arruř i teđa, maca necc d aysum mmenzey sadu ddnub, ¹⁵minzi war ssiney min i ya ggey umi war tteggey min xsey, maca min carrhey d manawenni i tteggey. ¹⁶Mařa tteggey min war ttexsey, ad wafqey ak-d ttawrat, belli aqqa nettat teřbař. ¹⁷Řexxu necc war tteggey man aya ead, maca ddnub i d ayi izeddyen ittegg it. ¹⁸Minzi ssney war dayi izeddey min icnan, d man aya ixš ad yini deg weysum inu, minzi nneyyet aqqa-tt dayi, maca řexdayem n tcuni, war tent ufiy ca. ¹⁹Minzi war tteggey řxar i xsey, maca řyar i war ttexsey ca, d manawenni i tteggey. ²⁰Mařa tteggey min war ttexsey, war iři ead d necc i itteggen man aya, maca ddnub wenni d ayi izeddyen. ²¹Xenni ttafey ttawrat-a dayi: xmi xsey ad ggey řxar, aqqa dayi řyar. ²²Minzi farhey s ttawrat n Arebbi zi jjihet n daxeř n bnađem, ²³maca ttwařiy din ttawrat nneđni deg iyezdisen n *arrimet* inu, tettmenya ak-d ttawrat n řeçeř inu uca třebbes ayi s ttawrat n ddnub tenni iřan deg iyezdisen n *arrimet* inu. ²⁴Ayeřřat mana wemcum-a n bnađem i řiy! Wi d ayi i ya issnejmen zi *arrimet*-a n řmewt? ²⁵Ttqadiy Arebbi s Yeccu Lmasiř Siditney! Ammu aqqa necc simant inu s řeçeř i xeddmey i ttawrat n Arebbi, maca s weysum i ttawrat n ddnub.

Tudart s Arruř Iqeddsen

8 ¹Xenni war dinni bu lřiřab řexxu x yinni di Lmasiř Yeccu, inni igguren war iři deg webrid n weysum maca *deg webrid* n Arruř. ²Minzi ttawrat n Arruř n tudart di Lmasiř Yeccu, aqqa tfekk

ayi zi ttawrat n ddanb d řmewt. ³Minzi min war tzemmar ttawrat mařar tuya teđeef s weysum, Arebbi am d issekk Mmis deg weysum yarewsen di ddanb uca man aya x ssibbet n ddanb, aqqa iřaseb ddanb deg weysum, ⁴řima ad itwakemmeř dayney řumur iseggdan n ttawrat, deg inni igguren war iři deg webriđ n weysum maca *deg webriđ* n Arruř. ⁵Minzi inni iřan n weysum tteggan nneyyet nsen deg weysum, maca inni n Arruř tteggan tt di Arruř. ⁶Minzi nneyyet n weysum d řmewt, maca nneyyet n Arruř d tudart d řehna. ⁷Minzi nneyyet n weysum d řeđawat i Arebbi minzi war tettegg ca array i ttawrat n Arebbi, war d as tzemmar eawed. ⁸Inni deg weysum war izemmaren ad arđan Arebbi. ⁹Maca kenniw war teđim ca deg weysum, maca di Arruř mařa izdey daywem Arruř n Arebbi. Maca mařa řed war wařes bu Arruř n Lmasiř, d wenni war ittiři nnes. ¹⁰Mařa tuya Lmasiř daywem, aqqa arrimet temmut zi ssibbet n ddanb, maca Arruř aqqa-t d tudart zi ssibbet n tsegda. ¹¹Mařa Arruř n wenni i d issnekkaren Yeccu zeg imettinen izdey daywem, aqqa wenni i d issnekkaren Lmasiř zeg imettinen ad isseddar eawed arrimat nwem ifennan s Arruř nnes i izeddyen daywem. ¹²Xenni, a awmaten, neccin s umarwas, war iři i weysum řima ad neddar x řeřsab n weysum, ¹³minzi mařa teddarem x řeřsab n weysum, ad temtem, maca mařa tenyim řexdayem n arrimet s Arruř, ad teddarem. ¹⁴Minzi marra inni itwanedhen s Arruř n Arebbi, nitni d ayt n Arebbi. ¹⁵Minzi kenniw war teksim ca arruř n tesmuři *wenni kenniw i řa yarren d isemyan řima ad zzayes teggwedem eawed*, maca aqqa teksim Arruř i zi netwaqbeř d arrawen, i zi nettřaya ‘Abba’, *min ixs ad yini ‘Baba’ niy ‘Tababat’*. ¹⁶Arruř simant nnes icehhed ak-d arruř nney belli neccin d tarwa n Arebbi. ¹⁷Mařa neccin d tarwa, aqqa-ney eawed d iwriten, iwriten n Arebbi d iwriten ak-d Lmasiř, xenni, mařa nweddeb akis, ad netwaeuři akis eawed.

Aeuři i d řa yasen

¹⁸Aqqa řessbey aweddeb i xaney ittekken iđa, war isdiheř ca ad itwaebar s ueuři i d řa itwasseđharen dayney. ¹⁹Minzi marra min d itwaxeřqen ittraja asargab n ayt n Arebbi s mmezři ameqqran. ²⁰Minzi marra min d itwaxeřqen, aqqa Arebbi igg it di řewhi, war t iggi amenni waha, maca igg it s řyarađ, ²¹s usitem belli uřa d marra

min d itwaxerqen simant nnes ad itwafekk eawed zi tesmuḡi i řyecç yar tiřelli n ueuḡi n tarwa n Arebbi. ²²Aqqa nessen belli marra min d itwaxerqen izehhar jmiē s unezbar n tarwa ař ida. ²³War iḡi man aya waha, maca neccin simant nney, inni yar teḡa tmenzut n Arruḡ, nzehhar eawed deg ixef nney, nettraja ad netwaqbeř d mmis, afekki n arrimet nney. ²⁴Minzi aqqa netwassenjem deg usitem-a. Maca asitem ittbanen war iḡi d asitem, minzi min ittbanen i řed, mammec i řa yegg ad dayes issitem ead? ²⁵Maca mařa nessittim min war nettwiři, aqqa nettraja t s řřbar. ²⁶Amenni ad iēawen Arruḡ tuđeēft nney, minzi war nessin ca mammec d aney i řa icuwwar ad nezzaḡ, maca Arruḡ simant nnes ittceffeē dayney s izehharen war ineṡqen. ²⁷D wenni ittbeqqcen deg wuřawen issen min iḡan d nneyyet n Arruḡ, aqqa tettceffae deg imqeddasen am mammec t ixš Arebbi. ²⁸Neccin nessen belli marra timesřayin xeddment ak-d wayawya i řxar i yinni ittexsen Arebbi, inni itwařayan elařsab lyarađ nnes. ²⁹Minzi inni izzar issen iten, aqqa izzar iēeḡem iten řima ad iřin di řřifet n Mmis řima ad yiři netta d amenzu jar wařtas n wawmaten. ³⁰Uca inni izzar iēeḡem iten aqqa d inni x d iřaya tanya u inni x d iřaya aqqa d inni isegged tanya u inni isegged aqqa d inni isseuḡa tanya.

Tayri n Lmasiḡ

³¹Min i řa nini xenni di man aya? Mařa Arebbi akidney wi d aney i řa iđadden? ³²Wenni war icetřaren ca x Mmis maca iwc it di třweē nney marra, mayemmi war d aney itticc kuřci ak-d Mmis eawed? ³³Wi i řa iksin tanfuč i yinni itwaxđaren zi Arebbi? Arebbi d wenni ittseggaden. ³⁴Wi xaney i řa iřekmen? Lmasiḡ d wenni immuten, ead řsen, netta d wenni d itwassnekkaren, d wenni iḡan tanya x ufusi n Arebbi uřa netta d wenni ittceffeēn dayney tanya. ³⁵Wi d aney i řa iđan x tayri n Lmasiḡ? Ma řeřřart niḡ đđiqat niḡ amarret niḡ řaz niḡ tuēaryent niḡ lxařar niḡ ssif? ³⁶Am mammec tura “Aqqa x ssibbet nnek netwaney ass ikmeř, netwařseb amecnaw iřuřiyyen i tyařřt.”³⁷Maca di man aya marra nedweř ktar zeg inni iyellben s wenni d aney ixsen. ³⁸Aqqa necc twassqenēy belli niḡ řmewt niḡ tudart niḡ lmalakat niḡ řřukkam niḡ řřulařat niḡ min n yiđa niḡ min i d řa yasen ³⁹niḡ řueřa niḡ raḡay niḡ uřa d ict n řřajet nneđni zi min d itwaxerqen tzemmar ad aney tebđa x tayri n Arebbi tenni di Lmasiḡ Yeccu Siditney.

Arebbi d weydud nnes Israyil

9¹Qqarey tidett di Lmasih, war ssxarriqey ca uca tanefsect inu tcehhed εawed s Arruḥ Iqeddsen, ²belli ɣari acdan imɣar d řehriq war ittbeddi deg wuř inu. ³Aqqa tuɣa ssitimex, maelik ufiy simant inu twaneεrey zi Lmasih di ttwεe n tarwa n tmurt inu εlahsab aysum. ⁴Nitni d Israyiliyyen, twaqebřen d mmis, ɣarsen uεuđi d řeuhud d ttawrat d řxedmet n uεbad *di taddart iqeddsen* d řwuεud, ⁵ɣarsen řejdud uca zzaysen Lmasih x webrid n weysum wenni d Arebbi sennej marra min iđan, aqqa netta itwabarek i řebda qaε, amin.

⁶Maca war iđi ammu ařmi uřa d awař n Arebbi war yiwiđ, minzi marra inni zi Israyil war đin ca d Israyiliyyen ⁷uřa d marra nitni war đin ca d tarwa n Ibrahim, minzi nitni d zzariεet n Ibrahim, maca *adlis iqqar* “Di Iřhaq ad ac řayan zzariεet”. ⁸Xenni maci tarwa n weysum iđan d tarwa n Arebbi, maca tarwa n řwuεud ad twařesben d zzariεet. ⁹Minzi awař n řwaεd d wa “Yar řweqt-a ad d aseɣ uca ad ɣares yiři ɣar Sara mmis.” ¹⁰War teđi tanita waha, maca uřa d Rifqa teksi s ddeyset zeg ijjen, netta d Iřhaq jedditney. ¹¹Minzi umi εad war d ixřiq řed, war ggin εad řxar uřa d řɣar, řima ad iqqim lɣarađ n Arebbi am t ixđar netta, war iđi deg webrid n řexdayem maca deg webrid n wenni ittřayan, ¹²aqqa itwana as “Aqqa ameqqran ad ixdem x umezyan”, ¹³am mammec tura “Yaεqub i xsey, maca carhey Isu”.

¹⁴Min i ɣa nini xenni? Ma iqedd ad yiři ɣar Arebbi min war iseggden? Eemmarř! ¹⁵Minzi netta iqqar i Musa “Ad areħmey wi xsey, ad areħmey uca ad řinneɣ x wi xsey ad řinneɣ.” ¹⁶Xenni tamesřact war teqqim ca ɣar wi ittexsen uřa ɣar wi ittazzřen, maca ɣar Arebbi wenni yareħħmen. ¹⁷Minzi adlis iqqar i Firεun “Aqqa i man aya ssnekkareɣ-d cek, řima ad zzayek ssecney jjeħd inu uca ad itwabarreħ isem inu di marra ddunnit.” ¹⁸Xenni netta ad yarħem wi ix s uca ad isseqseħ wi ix s.

¹⁹Řexxu ad ayi tinim “Mayemmi ittceťca εad, minzi wi i ɣa imeařan ak-d min ix s netta?” ²⁰Maca min teεnid cek, a bnadem, wenni ittqacaħen Arebbi? Ma min itwaggen izemmar ad ini i wenni t iggin “Mayemmi d ayi teggid ammu?” ²¹Ma war iđi ɣar bu-třaxť řřulťa x třaxť řima ad igg zeg ict n řεejnet ict n řqecεet i lkarama u wenneđni i ubehdeř? ²²Ma xenni, mařa Arebbi - am tuɣa ix s ad isscen lɣađab nnes uřa ad issbeyen jjeħd nnes - aqqa

yarbu s waṭṭas n ttasie n řxaḍar řeqcue n lyaḍab inni itwassewjuden i uhellek, ²³ħima xenni ad issbeyyen agra n ueuġi nnes x řeqcue n areħmet inni izzar issewjed iten i ueuġi, ²⁴inni zwaysen neġa uřa d neccin umi d aney-d iřaya, inni war iġin zeg Wudayen waha, maca eawed zi řegnus. ²⁵Amecnaw mammec iqqar Husiya eawed “Ad semmiy i wenni war iġin d aydud inu ‘aydud inu’ uca i wenni war iġin d ameizz d ‘ameizz’.” ²⁶“Ad yiři deg wemcan mani d asen itwanna ‘War teġim ca d aydud inu’, belli dinni ad asen řayan ‘tarwa n Arebbi iddaren’.” ²⁷Icaeya ittřaya zi jjihet n Israyil “Mařa tuya řqedd n tarwa n Israyil amecnaw ijdi n řebħar, aqqa min i řa iqqimen ad injem, ²⁸minzi netta ad ikemmeř tamesřact uca ad iqḍee awař s tsegda, minzi Arebbi ad igg awař iqeḍeen x tmurt deyya.” ²⁹Am mammec izzar Icaeya inna “Maelik Arebbi n Sabaeut (=řeeskar n ujenna) war d aney iji zzariet, ad nedweř amecnaw Sudum uca ad narwes di Gamurra.”

Nnebřa liman n Israyil

³⁰Min i řa nini xenni? Řegnus inni war yarezzun tasegda, aqqa ksin tasegda, maca tasegda tenni s liman. ³¹Maca Israyil am tuya iḍeffar ttawrat n tsegda, war yiwiḍ ca řar ttawrat n tsegda. ³²Mayemmi? Minzi nitni arezzun ayenni, war iġi ca zi liman maca zi řexdayem n ttawrat, minzi nitni nderfen deg weřru n uneqraḍ. ³³Am mammec tura “Aqqa ad ggey di Siyun ařru n uneqraḍ d tařḍart n řefḍiħet u marra wi zzayes i řa yammen, war ittseḍħi ca.”

10 ¹A awmaten, řefraħet n wuř inu uca tařaġit tenni zzuġeř řar Arebbi x ssibbet n Israyil, aqqa-tt i usenjem. ²Aqqa cehhdey xasen aqqa nitni řarsen cḍaret i Arebbi, maca war iġix řeħsab n tmusna ikemmřen. ³Minzi am tuya war ssinen tasegda n Arebbi, arezzun ad ggen tasegda n ixef nsen, war ttwaḍeen ca i tsegda n Arebbi. ⁴Minzi aneggar n ttawrat netta d Lmasiħ, aqqa-t d tasegda i kuř ijjen wenni yumnen. ⁵Minzi Musa yura zi jjihet n tsegda tenni zi ttawrat uca iqqar “Bnadem wenni i d ittegggen man aya, ad iddar zzayes.” ⁶Maca tasegda tenni zi liman teqqar ammu “War teqqar deg wuř nnek ‘Wi i řa iġaeeḍen řar ujenna?’ ħima ad d issehwa Lmasiħ”, ⁷niy “Wi i řa ihwan deg weħfur?” ħima ad issgaeēed Lmasiħ zeg imettinen. ⁸Maca

min i ya tini tsegda? “Awař yudes i cek, aqqa-t deg uqemmum nnek uřa deg wuř nnek”. Wa d awař n liman i zi nettbarreh.⁹Mařa tcehded s uqemmum nnek belli Yeccu d Sidi uca ad tamned s wuř nnek belli Arebbi issnekkar it zeg imettinen, ad twassnejmed.¹⁰Minzi s wuř i zi ittamen ař tasegda uca s uqemmum icehhed zzayes i usenjem.¹¹Minzi adlis iqqar “Marra wi zzayes i ya yammen, war ittşedđi ca.”¹²Minzi war din bu řfarz jar Wuday d Uyunani, minzi Sidi d ijjen i marra, aqqa yares ařas n wagra i marra inni xas-d ittřayan.¹³Minzi “Kuř ijjen wenni i ya iřayan s yisem n Sidi ad injem.”¹⁴Mammec xas i ya iřayan x wenni i di war uminen ca? Mammec i ya yammen deg wenni umi war sřin uca mammec i ya sřen mařa uřa d ijj war zzayes ibarreh ca?¹⁵Mammec i ya barrřen mařa war d twassekken? Am mammec tura “Mečar đarfen idaren n yinni ittbarřen s řexbar ařebħan n řehna, inni ittbarřen timesřayin tişebħanin.”

¹⁶Xenni maci marra řtaeen i řexbar ařebħan, minzi Icaeya iqqar “A Sidi, wi i ya yammen zi tebrat nney?”¹⁷Aqqa liman zeg usħessi uca ařessi zeg wawař n Arebbi.¹⁸Maca ad iniř “Ma zeema nitni war sřin?” Wah, sřin “Řħess nsen iffey-d řar marra timura uřa d awařen nsen řar ineggura n ddunnit.”

¹⁹Maca ad iniř “Ma Israyil war tefhim ca man aya?” Yar umezwar Musa inna “Ad daywem ggeř tusmi zeg yinni war iřin ca d řgens uca s ij n řgens afyuř ad daywem ggeř axeyyeq.”²⁰Xenni Icaeya izem ad ini “Aqqa ufin ayi, inni war xafi yarezzun, aqqa dewřey baney-d i yinni war xafi isseqsın.”²¹Maca zi jjihet n Israyil iqqar “Ass ikmeř sswizzdeř ifassen inu i weydud ieeřsan iyennen.”

Řbaqiyyet n Israyil

11 ¹Ad iniř “Ma yugi Arebbi aydud nnes?” Balak, aqqa necc simant inu eawed d Israyili zi zzarišet n Ibrahim, zi teqbič n Binyamin.²Arebbi war inetřar ca aydud nnes i tuya issen qbeř. Niř war tessinem ca min iqqar wedlis x Iliya, am mammec tuya iksi tanfuč x Israyil řar Arebbi uca iqqar³⁴A Sidi, nyin imkacafen nnek, areddğen aealtar. Qqimeř necc waha uca nitni arezzun řeemar inu.”⁴Maca min d xas yarra Arebbi? “Aqqa jjiř i yixef inu sebea ařaf n yeryazen war đrin ca řar idaren n Baal.”⁵Ammu di řweqt n yiđa

^{10:8} Tiř. 30:12-14 ^{10:11} Ica. 28:16 ^{10:13} Juw. 2:32 ^{10:15} Ica. 52:7; Nah. 1:15 ^{10:16} Ica. 53:1
^{10:18} Sbh. 19:4 ^{10:19} Tiř. 32:21 ^{10:20} Ica. 65:1 ^{10:21} Ica. 65:2 ^{11:3} 1 Ijğ. 19:10,14 ^{11:4} 1 Ijğ. 19:18

εawed, aqqa teqqim ict n řbaqiyyet am tt ixđar netta x řehsab n nniemet. ⁶Mařa teđa s nniemet, aqqa war tettiři ead s řexdayem niy xenni nniemet war teđi ead d nniemet. Maca mařa s řexdayem, war teđi ead d nniemet. Mařa lla, aqqa řxedmet war teđi ead d řxedmet. ⁷Min i ya nini xenni? Min tuya tarezzu Israyil war t tetřif, maca inni itwaxđaren řřfen t uca inneđni inni iqqimen, dewřen qeřšen. ⁸Am mammec tura “Aqqa Arebbi iwc asen arruħ n yiđes d tiřřawin i war ittwiřin, d imezzuyen i war ittesřin ař ass n yiđa.” ⁹Dawud iqqar “Ad tedweř tazewđa n tiyarřin nsen d taxceft d tafđuč d řenkrift d uxeđeř aeeffan i nitni ¹⁰uca ad daryřent tiřřawin nsen ĥima war ttwiřin uca ad iqwes weerur nsen i řebda.”

Řefruε iřeqqmen

¹¹εawed ad iniy “Ma nderfen ĥima ad wđan?” εemmarř! Maca s uweřřu nsen yiweđ-d usenjem i řegnus, ĥima ad daysen igg tusmi. ¹²Mařa idweř uweřřu nsen d agra d ameqqran i ddunnit uca taxessart nsen d agra i řegnus, mečar qae i ya tiři řekmařet nsen ktar.

¹³Aqqa ssawařey akidwem, a řegnus, umi ġiy d amazan i řegnus uca ssemyarey di řxedmet n tsexxart inu, ¹⁴attay ad yiři ggiy tusmi deg weydud inu (=weysum inu) uca ad twassnejmen ca zzaysen. ¹⁵S minzi, mařa amendar nsen aqqa-t d ařrah n ddunnit, mammec i ya yiři weqbař nsen myir tudart zeg imettinen? ¹⁶Mařa tuya tamenzut n řřabet tqeddes, amenni uřa d řejnet n arecti tqeddes, mařa tuya aźwar iqeddes amenni uřa d řefruε. ¹⁷Maca mařa tuya itwaqeřř ca n řefruε u cek, d azemmur itwařeqqmen deg wemcan nsen, tdewřed tessnefeed zeg iźewran d zzept n tztunt, ¹⁸war tneffex ca x řefruε. Mařa tneffxed, aqqa cek war tarebbud ca aźwar, maca aźwar yarebbu cek. ¹⁹Ad tinid “Aqqa twaqeřřen řefruε ĥima necc ad twařeqqmey.” ²⁰Mliħ! Nitni twaqeřřen umi war uminen ca uca cek s liman tetwařeqqmed. War tneffex ca, maca ggwed. ²¹Minzi mařa tuya Arebbi war ittceřřar ca x řefruε n řřbieet, attay war xak ittceřřar ca εawed. ²²Aqqa da d ředrafet n Arebbi d řewεaret nnes: řewεaret x yinni iwđan, maca ředrafet xak mařa tetřfed di ředrafet niy uřa d cek ad tetwaqeřřed. ²³Uřa d nitni, mařa war qqimen nnebřa liman, ad twařeqqmen ijj n umur nneđni, minzi yar Arebbi tizemmar ĥima ad ten iřeqqem εawed. ²⁴Minzi mařa cek

tetwaq̄eṣṣed zeg uzemmur wenni iḡan di řexřa uca cek twařeqqmed di tzitunt tenni iḡan di řeeks n řřbīet nnek, meçař ihewnen ktar ad twařeqqmen inni d řefrue s řřbīet nnes di tzitunt nsen?

Asenjem n Israyil

²⁵Minzi war ttexsey ca, a awmaten, ħima war d tiřim d imiřisen ak-d yixef nwem, ad teqqimem war tfehmmem ca ssirr-a: aqqa temsar řeqsaĥet x ict n tesyart n Israyil ař i d řa yadef uemmar n řegnus. ²⁶Ammu i řa tenjem marra Israyil am mammec tura

“Amsenjem ad d iffey zi Siyun uca ad issbeēēed řeqjaĥet x Arebbi x Yaequb. ²⁷D wa d řeahd zzayi i nitni x minni i řa mĥiy ddnub nsen.”

²⁸Zi jjiĥet n řexbar ařebĥan waxxa nitni d řeedyan x ssibbet nwem, maca umi twaxđaren zi Arebbi aqqa nitni d imeizzen x ssibbet n řejdud. ²⁹Minzi timewca d řřayit n Arebbi aqqa netta war xasent ittendemmi ca. ³⁰Minzi am mammec tuřa kenniw war tetřiem ca Arebbi, maca řexxu aqqa teksim areĥmet s řmuēřiyet nsen, ³¹ammu nitni eawed war řřien ca řexxu, ħima nitni eawed ad ksın areĥmet s areĥmet nwem. ³²Minzi Arebbi iĥebbes iten marra sadu řmuēřiyet, ħima ad ten yarĥem marra.

³³A raġay n wagra d tiřit d tmusna n Arebbi, mammec i řa ggey ad qeġbey řeĥkamat nnes, mammec i řa ggey ad afey ibriden nnes.

³⁴“Minzi wi i řa issnen nneyyet n Sidi niy wi d as iḡan d amcawar?”

³⁵“Niy wi d as izzaren iwc as umi d as ittxeřša ad itwaxeġeř zzayes?”

³⁶Minzi zzayes d zi řares d řares kuřci. Yares aeuġi i řebda qaē. Amin.

Tiyarřin iddaren

12 ¹Ttettarey zzaywem, a awmaten, s areĥmet n Arebbi, ad tqeddmem arrimat nwem d tayarřt iddaren, iqeddsen, yarđan i Arebbi, wa d aēbad nwem icuwwaren. ²War temquddam ak-d zman-a, maca bedđrem s uřeqqem n řeēeř nwem zi jdıd ħima ad tqeġbem min ixs Arebbi: min icnan d min yarđan d min ikemmřen. ³Aqqa s nniemet tenni i d ayi immewcen, qqarey i kuř

ijjen zzaywem, war ttxarreş sennej i min ittřiq uxarraş nnes, maca xarreş di min ittřiqen řqedd n liman i d awem iwca Arebbi i kuř ijjen zzaywem. ⁴Am mammec řarney ařtas n iyezdisen deg ict n arrimet uca marra iyezdisen *n arrimet* war řarsen bu řxedmet d icten, ⁵ammu neccin, waxxa neccin d ařtas, aqqa-ney d ict n arrimet di Lmasiř d iyezdisen ijjen i wenneđni. ⁶Aqqa řarney timewca imsebđan ełařsab nniemet tenni i d aney immewcen: ma akacaf ełařsab liman, ⁷niy wi ixeddmn di tsexxart, niy wi isseřmaden deg useřmed, ⁸niy wi ičeřmen deg ueřam, niy wi iwcin s tecrimet, niy wi ittđebbaren s umħađ, uřa wi yareħħmen s řefraħet.

Tayri jar wawmaten

⁹Ad tiři tayri nnebřa nnifaq. Carhem řyar, tcebbarem di min icnan. ¹⁰Iřim mliř ijjen ak-d wenneđni s tayri n tawmat, izzarem ad tcennem ijjen wenneđni, ¹¹war ttiřim d ifinyanen deg umħađ, iřim d timessi di arruħ, eebdem Arebbi, ¹²farħem di min tettrajam, di řeřart řbarem, řřfem di tzařit nwem řebda. ¹³Wcem afus di min iħđajen imqeddasen, rekkzem di tnewjit i ibarraniyyen. ¹⁴Barkem inni kenniw imarrten, barkem war neeřem ca. ¹⁵Farħem ak-d inni ifarħen, rum ak-d inni ittrun. ¹⁶Iřim s nneyyet d icten ak-d wayawya. War ttceyřem ca s tmesřayin yueřan maca ruħem ak-d imwađen. War ttiřim ca d imiyisen ak-d yixef nwem. ¹⁷War ttarrim ca ħed x řyar s řyar. Ĥđam min icnan i marra iwdan. ¹⁸Mařa tzemmarem, meċař mma i d ittasen zzaywem, seřħem ak-d marra iwdan. ¹⁹War ttentiqimem ca, a imeizzen, maca wcem amcan i lyađab minzi tura “Nneqmet i necc, necc ad xeğřey” iqqar Sidi. ²⁰Mařa iğuz řeedu nwem, seccem t, mařa ifud, wcem as ad isu, minzi mařa teggid aya, ad tyarwed iřefđawen itteħduduqen x uzeğif nnes, ²¹war xak ittyellib ca řyar, maca yelleb x řyar s řxar.

Aswađee i inni iħekkmen

13 ¹Kuř řeemar ad iwađee i řřulřa n yinni iħekkmen, minzi war din řřulřa myř s Arebbi, d tinni iğan aqqa issbedd itent Arebbi. ²X uyenni wenni i řa imeařan ak-d řřulřa, ittemeařa ak-d min issbedd Arebbi, d yinni ittemeařan ad ksin řħukm nsen. ³Maca řħukkam war ġin i tiggwudi n řexdayem iřebħen, maca i řexdayem

tieffanin. Ma tixed ad tiřid nnebřa tiggwudi zi řřulřa? Egg min icnan, ad ac yiři ccan zzayes, ⁴minzi netta d amsexxar n Arebbi i řefdeř nnek. Maca mařa teggid řřar, ggwed, minzi war ikessi ca ssif bařeř umi netta d amsexxar n Arebbi, aqqa ineqqem s lyađab x wenni itteggem řřar. ⁵Xenni ittxeřř ad as neřřaε, war iđi x ssibbet n lyađab waha, maca εawed x ssibbet n tnefsect. ⁶Xenni x ssibbet-a ad txeđsem đđariba umi nitni d ixeddamen n Arebbi iřeřřan x man aya simant nnes. ⁷Wcem i marra min d asen ittxeřřan: đđariba i wenni umi d tusa đđariba, řexřař i wenni umi d yusa řexřař, aweqqar i wenni umi d yusa uweqqar, ccan i wenni isdaheđem ccan.

Syarđem ixef nwem s Sidi Yeccu Lmasiř

⁸War tteggem amarwas řar řed myir wenni n tayri ak-d wayawya, minzi wenni ittexsen wenneđni, aqqa ikemmeř ttawrat. ⁹Minzi tiweřřa ‘war zenni’, ‘war neqq’, ‘war tticar’, ‘war cehhed zřur’, ‘war ttasem’ uca mařa din ca n tewřeyyet nneđni, aqqa-tent munent deg wawař-a ‘ad tixed amqarreb nnek amecnaw ixef nnek!’. ¹⁰Tayri war ttđarri ca amqarreb. S uyenni tayri nettat d řekmař n ttawrat. ¹¹Aqqa nessen řweqt, belli řexxu d tasaεeet řima ad nfaq zeg iđeř. Aqqa řexxu asenjem nney yudes-d ktar zeg wami numen. ¹²εřayen teedu řiřet, iweđ-d uziř. X uyenni ad nessars řexdayem n tađest, ad neksi řesnař n tfawt. ¹³Ad nuyur s ucuwwar axmi d aziř, war iđi deg uraren n řefsad d uyelli uřa di ccehwat n arrimet d ufeccuř niy deg umenyi d řeřsed, ¹⁴maca arđem Sidi Yeccu Lmasiř, war tteggem řřweε i weysum x ssibbet n nnecwat.

Wi iđeεfen d wenni ijeħden

14 ¹Wi iđeεfen di liman, qebřem t, maca war iđi řima ad řħarrcem deg ixarriřen. ²Aqqa wenni yumnen ad icc kuřci, maca wenni iđeεfen ad icc tibbi waha. ³Wenni ittetten, war isseřqari wenni war ittetten, d wenni war ittetten, war iřekkem x wenni ittetten, minzi Arebbi iqbeř it. ⁴Min teenid cek wenni iřekkmn x ismeř n wenneđni? Ma ibedd niy iwđa, d man aya i bab nnes. Maca ad ibedd, minzi Arebbi izemmar ad t issbedd d abeddi. ⁵Aqqa din řed ittyiř as aqqa din ass sennej i wass nneđni, d wenneđni ittyiř as aqqa kuř ass kifkif. Ejj kuř ijjen ad iqnee di řbař nnes nican. ⁶Wenni

iweqqaren ij n wass, i Arebbi i t ya iweqqar. Wenni war iweqqaren ass, i Arebbi i war t iweqqar. Wenni iccin, ad icc i Arebbi, minzi ad icekkar Arebbi. Wenni war iccin ca, i Arebbi i war icci ca uca netta ad icekkar Arebbi εawed. ⁷Minzi uřa d ijj zzayneq aqqa iddar i yixef nnes, uřa d ijj n mma immut i yixef nnes. ⁸Minzi mařa neddar, ad neddar i Arebbi, niy mařa nemmut ad nemmet i Arebbi. Mařa neddar niy nemmut, aqqa neccin i Arebbi. ⁹Minzi i uya i immut Lmasih, xenni ikkar-d uca idweř iddar εawed, ĥima ad iħkem x inni immuten uřa x inni iddaren. ¹⁰Maca cek, mayemmi i ya tħekmed x umac? Niy mayemmi εawed tesseħqarad umac? Minzi neccin marra ad nbedd qibač i řkursi n ccraε n Lmasih. ¹¹Aqqa tura

*“Necc ddarey, iqqar Arebbi, i necc ad ađaren marra ifadden,
kuř iřes ad iched aqqa necc d Arebbi.”* Ica. 45:23

¹²Xenni kuř ijj n ad igg řeħsab x ixef nnes qibač i Arebbi. ¹³Ejj aney war nħekkem ijj n x wenneđni, maca ĥsen ad tħekmed ammu: war teggid ca azru n uneqrađ niy min di i ya innedref uma. ¹⁴Necc ssney, aqqa twassqenεey di Sidi Yeccu, belli uřa d ict n řħajet texmej s yixef nnes, myir i wenni tt iħesben d řexmej, aqqa-tt i netta waha umi texmej. ¹⁵Mařa ixeyyeq umac x ssibbet n macca, aqqa cek war tuyured εad di tayri. War tteħħi ca s macca nnek wenni i xef immut Lmasih. ¹⁶Min iġan d řxar i cek, war tejj ĥed ad xas issiweř s řyar. ¹⁷Minzi tageldit n Arebbi war teġi di macca d tissit, maca di tsegda d řehna d řefraħet s Arruħ Iqeddsen. ¹⁸Minzi wenni isexxaren i Lmasih di man aya, aqqa yarđa Arebbi uca netta d ameqbuř yar iwdan. ¹⁹Ad neđfar xenni min iġan i řehna d řebni n ijj n i wenneđni. ²⁰War ttareddeġ ca řxedmet n Arebbi x ssibbet n macca. Marra timesřayin aqqa-tent d timezdag, maca uct x bnađem wenni i ya igg azru n uneqrađ s macca nnes. ²¹Mliħ umi war tetteted ca aysum uřa war tsessed ca binu, niy war tettegged uřa d ict n řħajet i dayes i ya inqaređ niy itwaxeyyeq umac niy i zi i ya itwađeef. ²²Ma dayek liman? Ad ac yiři i yixef nnek zzat i Arebbi. Sseed n wenni war ittemcarraε ak-d yixef nnes di min d as ittyiř mliħ. ²³Maca wenni ittcekkkan xmi ittett, itwaħaseb, minzi man aya war iġi zi liman. Qaε min war iġin zi liman, aqqa-t d dđanb.

15 ¹Maca neccin inni ɣar iɣa jjehd, ittxeṣṣ aneɣ ad narbu tuɔeef t n yinni war ɣar iɣi jjehd, war d nettiwi ca arɔa i yixef nney. ²Kuř ijjen ad issarɔa amqarreb nnes i tcuni d řebni. ³Minzi Lmasih ɛawed war issarɔi ca ixef nnes, maca am mammec tura “Tikkwura n yinni i cek ikkwaren, wɔant-id xafi.” ⁴Minzi marra min tura qbeř, tura i useřmed nney, ĥima s řřbar d ucejjeɛ s min iɣan deg idlisen ad ɣarney yiři usitem. ⁵Arebbi n řřbar d ucejjeɛ ad awem iwc ĥima ad txarrřem kifik jarawem elařsab Lmasih Yeccu, ⁶ĥima s ijj n array d ict n tmijja ad tessemyarem di Arebbi, Babas n Siditney Yeccu Lmasih. ⁷X uyenni qeřrem ijjen wenneɔni, am mammec d aneɣ iqbeř Lmasih ɛawed i ueuđi n Arebbi. ⁸Ad iniy, aqqa Lmasih Yeccu idweř d amsexxar n wextan di řřweɛ n tidett n Arebbi, ĥima ad iɔmen řwuɛud i řejdud ⁹uca ĥima řegnus ad ssemyaren di Arebbi x ssibbet n areĥmet am mammec tura “S uyenni ad cehdeɣ xak jar řegnus uca ad ĥemdeɣ isem nnek s izřan.” ¹⁰Iqqar ɛawed “Farĥem, a řegnus, ak-d weydud nnes”. ¹¹ɛawed “Ĥemdem Arebbi, a marra řegnus, sebbĥem t, a marra iyduden.” ¹²ɛawed Icaeya iqqar “Ad yiři uzwar n Yassa uca d wenni d ikkaren ĥima ad iĥkem x řegnus, ad dayes yiři usitem n řegnus.” ¹³Arebbi n usitem ad kenniw iccur s řefrařet d řehna di liman ĥima ad tfeyyɔdem s usitem zi jjehd n Arruĥ Iqeddsen.

Bulus d amseyyar n tsexxart n Lmasih i marra řegnus

¹⁴Necc simant inu twassqeneɣ zi jjihet nwem, a awmaten, aqqa kenniw teemmarem s tcuni, teccurem s marra tamusna, ĥima ad ieřem ijjen wenneɔni. ¹⁵Maca zeg uyezdis aqqa uriɣ awem s teryast ktar, a awmaten, maĥend ad kenniw ssɛeqřeɣ zi ssibbet n nniɛmet i d ayi immewcen zi Arebbi, ¹⁶ĥima ad iřiɣ d amseyyar n Yeccu Lmasih i řegnus maĥend ad xedmeɣ am ukehhan i řexbar ařebĥan n Arebbi, ĥima ad tiři tayarřt n řegnus d tameqbuč, tetwaqeddes s Arruĥ Iqeddsen. ¹⁷Aqqa ɣari aɛuđi di Lmasih Yeccu zi jjihet n timesřayin i ɣares ɣar Arebbi. ¹⁸Minzi war zeemeɣ ad ssiwřeɣ x ca war zzayi t iggi Lmasih, ĥima ad řřaɛen řegnus s wawař d řxedmet, ¹⁹s jjehd n řeɛřamat d lmuɛjizat uca s jjehd n Arruĥ Iqeddsen ař i ɣa kemmřeɣ abarreĥ n řexbar ařebĥan n Lmasih zeg Urcalim d řeɔruf nnes ař Illirikun. ²⁰Ammu tuɣa arezzuy s mmezři ad barĥeɣ, war iɣi mani itwasemma Lmasih qbeř ĥima war benniɣ x dsas n wenneɔni,

²¹maca am mammec tura “Inni war zzayes itwabarrhen ad zaren, d yinni war xas isrin ad fehmen.” ²²S uyenni tuya war zemmarey aṭṭas n imuren maḥend ad yarwem-d asej.

Bulus igga ad yarzef yar řmumenin di Ruma

²³Maca řexxu, umi war ħari bu wemcan ead di jwayeh-a uca umi tuya eawed xsey ad yarwem-d asej aṭṭas n iseggwusa zeg wami, ²⁴xmi i ya raḥey yar Sbanya, ad yarwem-d asej. Minzi ssitimej ad kenniw zarej xmi xawem-d i ya kkej d abrid uca kenniw ad ayi tessqebdem yar dinni, xmi i ya fewwjej d amezwar akidwem ca n řweqt. ²⁵Maca řexxu aqqa ruḥey yar Urcalim ħima ad xedmej i imqeddasen. ²⁶Minzi tuya yarḍa i Masiduniya d Axaya ad ggen ca n twiza i imezřaḍ jar imqeddasen inni iġan di Urcalim. ²⁷Tuya arḍan x man aya, maca tuya eawed daysen d amarwas. Minzi mařa tuya řegnus carcen di min ħarsen yar *Wudayen* x řeḥsab n arruḥ, ittxeř asen ad ten xedmen eawed s min ħarsen x řeḥsab n weysum. ²⁸Xmi i ya kemmrey man aya uca ad asen ssiwḍej řyiġet, ad d xawem kkej d abrid xmi i ya raḥey yar Sbanya. ²⁹Necc ssney belli mařa usiy-d yarwem, ad d asej s řmud iccuren s lbaraka n řexbar ašebħan n Lmasiḥ. ³⁰Ttarej zzaywem, a awmaten s Siditney Yeccu Lmasiḥ uca s tayri n Arruḥ, ad tbeddem nican akidi di tzaġit yar Arebbi x ssibbet inu, ³¹ħima ad twafekkej zeg inni war yuminen ca di Yahudiyya, ħima ad tiři tsexxart inu i Urcalim d tameqbuč yar imqeddasen, ³²ħima ad yarwem-d asej ccurej s řefraḥet s tmexsa n Arebbi uca ad areyyḥej akidwem. ³³Arebbi n řehna ad kiwem yiři marra idwem. Amin.

Aseġem aneggaru

16 ¹Weřřij kenniw zi jjihet n učmatnej Fubi, tenni d tamsexxart i tmesmunt di Kinxriya, ²ħima ad zzayes tareħħbem di Sidi am mammec ittriq i imqeddasen uca ad tt eawnem di min mma teħdaj zzaywem, minzi aqqa teawen aṭṭas uřa řa d necc. ³Seġmem x Briskilla d Akwila, ixeddamen akidi di Yeccu Lmasiḥ, ⁴inni isebbřen ixef nsen x ssibbet n tudart inu. War ġiy d necc waha wenni ten ittqadan, maca marra timesmunin n řegnus. ⁵Seġmem eawed x tmesmunt tenni di taddart nsen. Seġmem x Ibanitus, ameizz inu, wenni d amenzu

n Axaya i Lmasih. ⁶Seġmem x Maryem tenni tuġa tettamar aġtas xawem. ⁷Seġmem x Andrunikus d Yuniyas inni zi teqbiċ inu d inni d imeħbas akidi, aqqa-ten d iryazen ittwassnen jar imazanen, tuġa-ten di Lmasih qber xafi. ⁸Seġmem x Ambliyas, ameizz inu di Sidi. ⁹Seġmem x Urbanus, axeddam akidi di Lmasih d Astaxis ameizz inu. ¹⁰Seġmem x Abillis wenni ibanen d amqeġeb di Lmasih. Seġmem x aytbab n taddart n Aristubulus. ¹¹Seġmem x Hirudiyun wenni zi teqbiċ inu. Seġmem x aytbab n taddart n Narkissus inni iġan di Sidi. ¹²Seġmem x Tarifina d Tarifusa tinni ittamaren di Sidi. Seġmem x Barsis, ameizz, wenni ittamaren aġtas di Sidi. ¹³Seġmem x Rufus wenni itwaxdaren di Sidi uġa x yemmas d yemma inu. ¹⁴Seġmem x Asinkritus, Fligun, Hirmas, Batrubas, Hirmis uca x wawmaten inni akisen. ¹⁵Seġmem x Filuluġus d Juliya d Niriyus d weċmas d Ulimbas d marra imqeddasen inni akidsen. ¹⁶Seġmem x wayawya s usudem iqeddsen. Timesmunin n Lmasih marra ttseġament xawem.

¹⁷Tettareġ, a awmaten, ad teħdam zi wi itteġgen amsebdi d teinkrifin s řeeks n tyuri i teyrim uca beedem xasen ¹⁸Minzi amecnaw ina war xeddmn ca Siditney Yeccu Lmasih, maca aeddis nsen. S řehrud iřebħen izewwqen xeddeen uřawen n inni ihednen. ¹⁹Minzi ttaet nwem twassen ġar marra. S uyenni farħeġ zżaywem, maca xsey ad tiřim d imiyisen di tcuni uġa d iqubbaniyyen i řġar. ²⁰Arebbi n řehna ad iteħħa Cciřan sadu idaren nwem deġya. Nniemet n Siditney Yeccu Lmasih ad kiwem tiři. Amin.

²¹Ittseġam-d xawem Timutiyu wenni ixeddmn akidi uġa d inni zi teqbiċ inu: Lukiyus d Yasun d Susibatus. ²²Necc, Tartiyus, wenni yuran tabrat-a, ttseġameġ xawem di Sidi. ²³Ittseġam-d xawem Xayus wenni zżayi yareħħben uġa zi tmesmunt marra. Ittseġam-d xawem Irastus wenni x řřenduq n tendint d Kwartus, umatney. ²⁴Nniemet n Yeccu Lmasih ad kiwem tiři marra. Amin. ²⁵Wenni izemmar ad kenniw issejhed eħařsab řexbar ařebħan inu d ubarreh n Yeccu Lmasih, eħařsab asargab n ssirr wenni tuġa innufaren deg ikuden n řweqt n řebda ²⁶maca aqqa itwasseđhar-d řexxu uca itwasscen i ttaet n liman i marra řegnus s idlisen iqeddsen n imkacafen eħařsab řumar n Arebbi wenni iġan i řebda, ²⁷aqqa i Arebbi wenni d bab n tiyit weħdes, i netta umi i ġa yiři ueuġi s Yeccu Lmasih i řebda qaē. Amin.